


# Taolioù-teod El Maout



El Maout war al leurenn.  
sk. © Gael Fontana/gaelfontana.com



**Manuel Quemizet eo El Maout. E Douarnenez emañ o chom met fiñval a ra kalz, e mod-se emañ Manuel, 27 bloaz, mont a ra davet an dud all evit eskemm dre ar sonerezh pe c'hoazh ar c'hoariva. El Maout zo ur "one man band electro-buccal" hag anv a zo sevel tonioù gant ar genoù en ur veskañ *beat box*, da lâret eo, trouzioù-genoù enrollet war ar prim e-kerzh ar sonadeg gant ul *looper*. An trouzioù-se, ur wech enrollet, a vez berniet an eil re war ar re all.**



**g**ant pevar mignon eus Norvegia en deus krouet ur strollad c'hoariva, ar Zirk mir, ha bevet o deus daou vloaz hanter war ur vag dre lien. Eus Gres da Haiti, en ur dremen dre Varoko, Gambia hag ar C'hab Glas, o deus c'hoarriet kalz ha kejet gant kalz tud ivez. Bewech e oa ur gwir eskemm etre ar sonerien, an dañserien hag an arvesterien. Hag ar pal a oa neuze klask pikañ kalon an arvesterien dre ar sonerezh, fromañ ha kaout un eskemm war-eeun gant an dud hag implij pa vez tu, ar pezh o deus-int da reiñ evit boueta ar sonadeg. Klask a ra bepred tizhout ar pal-mañ. Gervel a ra, pe ne ra ket, hervez an aergelc'h, ar re o deus c'hoant da c'hoari gantañ hag e drouzioù-genoù.

## ➤ YEZH AR SONEREZH DREIST PEP TRA

Ur wech savet an tonioù e kan e "yaourteg" warne, hep yezh resis. Perak ne gan ket en ur yezh bennak? "N'hon ket ur mailh war ar gerioù, n'hon ket ur barzh da gentañ penn. Ha da eil, peogwir e plij ar sonerezh din dreist-holl" eme Vanuel. Teurel a ra evezh ouzh ar sonerezh, ar binvioù ha kerzenn ar c'han, met hep klask kompren ar pezh a vez lâret. "Da skouer, gant tout ar sonerezh 'm eus klevet pa oan bihan gant va zud, kalzik eus ar sonerezh selaouet gante a oa rock eus ar bloavezhioù 1960-1970, kanet e saozneg dreist-holl, pe c'hoazh jazz. N'eo ket ar pozioù a selaouen met ar sonerezh. Pa daolez pled ouzh ar pezh a vez kanet a-wechoù eo gwelloc'h

chom hep kompren. Farsus eo chom hep implij al lavar, evel-se ne glaskan ket tizhout ur rummad arvesterien resis, gallout a ra bezañ n'eus forzh piv, n'eus forzh pelec'h. Klask a ran kaout un eskemm hollekoc'h eget, da skouer, tud hag a vefe troet nemet war an dub pe an tekno. Kaout degouezhioù hag a vod an holl, tud deuet ha tud yaouank, setu ar pezh a blij din er festoù-noz" emezañ. An trede abeg a vefe liammet ouzh e labour graet e-touesk ar Zirk mir, mir e rusianeg a dalvez an douar hag ar peoc'h. Seniñ a raio El Maout war Leurenn Glenmor, e Karaez, d'an 18 a viz Kerzu 2015, gant Krismenn hag Alem ha Debruit.

Anna an Duigou

Evit gouzout hiroc'h:  
[www.zirkmir.com](http://www.zirkmir.com)  
<http://elmaout.wix.com>